

- Հետներն առած պատգամ ու թուղթ
Գավառացիք, ելած ջուխտ-ջուխտ,
Եկան հարգով, սըրտի դողով
Համագումար հայոց ժողով:
- 5 - Բարով եկաք, հազար բարի,
Դուք ծաղիկներ մեր գավառի.
Ողջուն տվավ, ինչպես կարգն էր,
Մեր հինօրյա Թիֆլիզը ծեր.
Դուք, որ էդպես ջուխտ եք գալիս,
10 Բա մեզ քանի ձայն եք տալիս,
Գավառացի մեր ախպերտինք:
- Հինգ,
- Բայց Թիֆլիզը կենտրոն ու մեծ...
- Թող լինի վեց:
- 15 - Զիջում արեք, մեկն ավելի:
- Զի կարելի:
- Ուրեմն էդպես.
Դե հիմի տես:
Թիֆլիզն եկավ շարան-շարան,-
20 Ընկերություն, ուսումնարան,
Ինժեներներ, բըժիշկ, տերտեր,
Տիկին, գրող, բյուրո մի բեռ,
Խըմբագիրներ թերթերից շատ,
Երեցփոխներ մի քանի հատ,
25 Վանքից եկան,
Բանկից եկան,
Իրենց տանից,
Ու Գըլզանից...
- Մո՛, էս ինչ է, աստծու խաթեր,
30 էսպես ժողով չենք տեսել դեռ,

Այսուհետև ո՛ւր կըմնա
Գավառի ձայն... գավառի շահ...
Այսպես ասին
Ի միասին

- 35 Մեր Երևան, Գյումրին ու Կարս.
Աղա Թիֆլիզ նայեց թարս-թարս,
– Տեղըդ նըստի՛ր, կռպի՛տ գավառ.
Քառսուն ձայնով ձգեց հավար,
Այնպես թնդաց ու վեր կացավ,
- 40 Որ գավառը նոր հասկացավ,
Թե ինչին են սեյմը ասում,
Ինչ է իրեն վաղն ըսպասում,
Ու, վախեցած էս փորձանքից,
Հանեց իսկույն իրեն ցանկից: